

國朝書獻類徵初編卷百四十三目錄

郎署五

王之銳

席啟寓

方登嶧

王丹林

段昕

許迎年

周邵生

潘麟

郭洛羅君

徐珽

顧陳埏

郭偉

汪錚

吳麟

黃承祖

曾世琮
李天龍

林佶

秦休

彭朝佐

龔夢熊

田同之

李開葉

曾逢聖

郭元鈺

高不騫

國朝耆獻類徵初編卷百四十三

通奉大夫前署江西巡撫江西布政使司布政使湘陰李桓輯
郎署五

王之銳

河間王仲穎先生既歿之十年予里居始得撫其生平槩略爲之
傳於戲先生純粹篤實好學君子也其居家真孝弟立身真有本
末讀書真有見地古所謂獨立之士行不愧影寢不愧衾孔子之
所謂善人孟子所謂善信先生真足當之惜乎生無大表見歿無
有傳其學者然而風期落落古與徒矣先生諱之銳號退庵仲穎
其字也世多知其字故以字傳先生先生幼志聖賢之學年十四

讀書至吾十有五章瞿然曰先師成童已志大學吾去成童一年耳曾小學之未通乎於是苦心焦思深自淬礪愛中庸齊明盛服語書揭臥次夜必整衣端坐或竟夜不寢康熙丁丑學使安溪李文貞公按河郡以課講受知屢目之召與語大歎賞曰南方無此學質也選貢之使從遊旣攜之直撫幕下每公退輒與講說古先微言精義七年盡聞文貞性命河洛算數音韻之學文貞入相招至京師邸第與景州魏大司空廷珍交河王少宗伯蘭生偕一日語三公曰盍從我往迎 駕熱河乎於時 內廷新立東書房集文學才技之士先生心知將薦己也不欲以捷途仕辭文貞心重之不復強己而魏王入 內廷癸巳魏捷鼎甲辛丑王 賜第皆

入翰林先生恬然安之當是時文貞以道德文章網羅天下登高而呼天下聰明才辨之士雲集響應上者雄奇駿偉敦琢鴻業以經世垂久次猶雍容詞苑鼓吹休明其餘翹首跂足攀援而取仕宦者紛綸不可勝數先生澹然沖默其閒獨與江陰楊文定名時以切劘身心研究經義爲務文貞嘗語人曰從吾遊者不翅數千人然而潛心學問不求聞達南楊北王二人而已其爲文貞推重如此館於恂邸王雅敬禮之一日小疾王遣醫來醫著方必首薺薺出王府先生曰吾疾果非薺弗瘳乎醫曰此故事耳薺出可勿用也先生笑命去之以纂修周易折中敘廣東陽春令至數月不能桔槔獲上改教職歸雍正六年里泮饒先生家餒困就依所親

河南確山令適有 旨召詣京師將有質豫督不知所緣逮之銀
鎗送刑部至則以固無罪也一訊罷遣除萬全教諭乾隆四年趙
泰安相國疏薦其學行擢國子助教居國學十二年自大司成下
遇之皆有加禮年近八旬日與諸生講授不倦己巳冬 詔舉經
學之士梅總憲穀成何少司空國宗並以疏舉壬申 上詢國子
耆學祭酒以三人上先生與焉 召之見病不能行其二人者皆
超擢司業而先生竟以明年謝病卒於家年七十有九先生之學
主於躬行實踐孝弟之氣滿容充體祭必敬喪必哀忌日不樂終
其身有兄暴於行動遇以非道先生怡然順受事之如嚴君或以
過先生先生曰世兄弟多貌相承吾兄遇我嚴弟我也吾何憾事

之益謹及官太學兄書至必再拜然後發兄病就訣京師先生躬
藥餌衣不解帶月餘卒哀慟欲去官遂服以例不可止居恆莊肅
如對賓客擬而言議而動口不道人過有德於人終身不使知之
自奉極薄廩祿所入節縮以奉其兄及親戚之乏者未嘗蓄一錢
其德行醇備自鄉之耆宿及太學士大夫稱道如出一口方望溪
先生曰仲穎孝友本天性學問法程朱其自命處真有矯矯不羣
壁立萬仞狀而廉靜之操恐安溪公有不如也與予祖友善予自
孩時卽聞予祖道其行義及見之京師每侍坐氣不屏自肅嘗過
其學齋老屋空曠四壁颯颯有風時方冬了無鑪火獨據一案經
籍鱗次滿前凝然若不知寒者先生涵養堅定然每自視欣然嘗

言被逮時內省無咎乃猶食不能下以爲學問之氣未充其言不欺志類如此諸經皆通貫尤邃於詩易自言自康熙丙戌迄雍正庚戌玩詩至千周子嘗窺見其手注易冊又聞四子書及詩皆有論述今索其家都不可得矣於戲惜哉

右傳戈濤撰

按選拔舊制逢卯酉年舉行至乾隆十八年始定例逢酉年一舉篇中康熙丁丑公受知

學使安溪李文貞公屢加歎賞至其選拔充貢當在康熙三十八年己卯科

席啟寓

君姓席氏先世望安定遠祖武衛將軍溫避黃巢亂渡江徙於吳
居洞庭之東山曾祖洙祖端攀皆不仕以子本楨貴推恩均贈
太僕寺少卿崇禎之季寇賊構患歲旱蝗人相食本楨饒貲財發
其橐白金八千兩糴米於襄樊輓之以舟順流下東賑青兗南散
給吳越全活者無算而又請毀家以佐軍儲巡撫應天都御史分
宜黃希憲聞於朝特授文華殿中書尋加太僕寺少卿階亞中
大夫君本楨之季子諱啟寓字文夏以國子監生援例補工部虞
衡清吏司主事 皇朝設六部職掌多準明代獨工部四司每受
制於內務府一失其意雖材美工巧不以爲良而虞衡掌山澤之

禁鼓鐃之局驗試之廳盜甲之廠除道捐溝之役事最繁瑣主者恆救過不給君遇人以和與物無忤甫莅官兼攝營繕屯田二司庶務悉理旋吏議鐃級畱任尋加二級 覃恩敕授文林郎贈厥考如其官封母延太孺人旣而請假養母以所居僻左獨學無友乃徙宅常熟春秋佳日版輿奉母往來題其圃中居曰娛暉之堂滋蘭樹蕙周覽湖山之勝歲己卯 御舟渡太湖親幸其圃君拜伏階下 天子顧問曰爾年方壯何以不來供職巡撫都御史宋公學對曰是以終養其母請回籍者 天子爲之霽容手摘盆中蕙蘭花登舟明年延太孺人卒君居喪盡禮終三年未嘗去衰麻齒肥甘也服除甫七月而君卒享年五十有三君家居以孝友敦

陸聞鄉里及在京師遭季父喪解官持服歸修族譜置祭田立義學人有稱貸者未嘗權子母質庫不計鎔釐人咸樂其寬厚少問業於華亭葉生有馨生固幾社名流也予友平湖陸君隴其學以躬行爲本旣釋褐知嘉定靈壽二縣事循行居天下第一徵入試四川道御史以直言放還君夙與訂僑札之分具書幣聘之至家教其二子永恂前席陸君沒君厚賻其喪葬申以婚媾集其遺書悉爲開雕行世暇又輯唐人詩百家亦鏤版行之 天子幸第時曾進 乙覽一時言詩者返之正音焉永恂前席俱歲貢生亦從予游君之葬也兩生來請銘嗚呼躬行之君子吾見罕矣以言乎論學則以正以言乎取友則必端以言乎仕進則知止蓋得夫陸

君講習之益者多也是不可無銘辭曰

古之葬者窆用石賙書方遣書策後乃納銘于邱阿辭苟達不在
多席君新阡頂山麓治繭室封斧屋樂哉斯邱無後艱宜爾子宜
爾孫孰銘其藏小邾氏匪異人陸君友

右墓誌銘朱彝尊撰

方登嶧 子式濟

方登嶧字鳧宗江南桐城人官工部郎著有述古堂詩鳧宗以朋友負罪牽連謫戍處極危苦之境而能種花賦詩以尋樂意所養定也迨奉 詔赦歸已殂謝塞外矣以孫問亭宮保貴 贈如其官

右 國朝詩別裁集小傳沈德潛撰

方式濟

方式濟字沃園江南桐城人康熙己丑進士官中書舍人沃園中翰考鳧宗水部以朋舊負辜牽累戍邊並及中翰既父子並殂塞外見無遺此矣而詩格廉悍樂府尤矯然不羣境不足以困之也

後以子問亭宮保貴 贈如其官

右 國朝詩別裁集小傳沈德潛撰

王丹林

王丹林字赤抒浙江錢塘人官中書舍人著有野航詩集赤抒詩品在牧之飛卿閒羈畱日下諸鉅公交口推重方欲薦揚明廷而中道摧折詩之鐫刻者亦少藝林至今想望之

右 國朝詩別裁集小傳沈德潛撰

